

## Color di bandera di Aruba cla pa wordo oficialisa

**ORANJESTAD —** A dicidi cua ta e color blauw oficial di bandera nacional di Aruba segun sistema di Pantone, cual ta e standard mundial pa esaki.

Lo bay mara Pantone 279 como color oficial den ley y lo crea dos articulo adicional, encargando Departamento di Cultura cu control pa no tin importacion mas di banderanan cu no tin e color oficial, y formulando sancion pa esunnan cu importa of vende banderanan cu no tin e color blauw aki.

Controversia riba e color blauw oficial di nos bandera a dura hopi aña. Tambe por a mira, specialmente den ultimo añanan, cu ta uza diferente colornan blauw pa nos bandera, te hasta na edificionan gubernamental y hasta di Gobernador. Tabatin diferente comisionnan

cu a wordo instala, tanto bou gobernacion di MEP como di AVP, cu pa un of otro motibo a keda pega y no a continua mas pa motibo di discusion riba color blauw di e bandera.

### Larkspur

Minister Oduber ta splica cu ora papia di e color blauw original di nos bandera ta papia di e color Larkspur cu ta aparece den e Dictionary of The British Color, cu for di aña 50 no a wordo continua. Sinembargo esunnan cu a scoge e color di nos bandera a scoge pa e color aki. Despues di a busca hopi a logra haya e diccionario aki na un libreria hopi bieu na Londres. For di momento ey Aruba ta conta cu un ehemplar di e buki aki pa por compara e color. Awo e discusion a bira cu e color mester ta igual na loke e tempo ey United Nation Blue tabata, pero hasta United Nation a cambia su color di bandera cierto momento.



Por lo tanto a dicidi pa uza e asina yama Pantone color 279, cu ta esun mas cerca di Larkspur.

Hecho ta cu tempo cu a lanta e prome bandera di Aruba na 1976, un bandera tabatin e color exacto, esta e Larkspur. Bandera aki a wordo traha na man. E otro 18 banderanan cu tabatin hunto cune y cu

a wordo lanta tambe (cual uno di nan ta na Archivo Nacional) no tabatin e color di Larkspur. Pantone 279 ta e color cu mas ta acerca e color di e prome bandera cu a wordo lanta na 1976.

### Juni

“Awor por fin nos a logra haya e color manera cu e ta. No tin discusion mas pa bay

busca cual ta e color di United Nation of ki color nan ta relata na dje of na Larkspur di e British Diccionario. Awor nos tine den nos man”, asina minister Oduber a declara. Ley pa mara esaki lo pasa den parlamento posiblemente den e prome dos simannan di juni venidero, asina minister di Cultura a duna di conoce. Unabes cu e legislacion pasa por introduci e sancion y e permiso cu ta bay tin mester pa por importa banderanan via Departamento di Cultura, pa di e forma ey entrante 1 di januari 2015 esaki por dreña na vigor y por tin un control estricto pa loke ta nos bandera. □

